

新元史

五行志中下

地理志第一

第拾肆册

志第十一

新元史卷之四十四

賜進士出身日講起居注官翰林院侍讀國史館纂修膠州柯劭忞撰

五行志中

洪範曰火曰炎上失炎上之性時則有火災草妖羽虫之孽羊禍其徵恆燠其色赤是爲赤眚赤祥

定宗三年戊申野草自焚牛馬十死八九民不聊生至元十一年十二月淮西正陽火廬舍鎧仗悉燬十八年二月揚州火元貞二年杭州火燔七百七十家大德八年五月杭州火燔四百家九年三月宜黃興國之大冶等縣火十年十一月武昌路火延祐元年二月眞州揚

子縣火三年八月重慶路火郡舍十焚八九六年四月
揚州火燔官民廬舍一萬三千三百餘區至治二年四
月揚州眞州火十二月杭州火三年五月奉元路行宮
正殿火上都利用監庫火九月揚州江都縣火燔四百
七十餘家泰定元年五月江西袁州火燔五百餘家三
年六月龍興路甯州高市火燔五百餘家七月龍興奉
新州辰州辰溪縣火八月杭州火燔四百七十餘家四
年八月龍興路火十二月杭州火燔六百七十家天厯
二年三月四川紹慶彭水縣火四月重慶路火延二百
四十餘家七月武昌路江夏縣火延四百家十二月江

夏縣火燔四百餘家三年四月河內諸縣火至順元年
五月丁酉杭州火池州火元統元年六月甲申杭州火
至正元年四月辛卯台州火乙未杭州火燔官舍民居
公廨寺觀凡一萬五千七百餘間死者七十有四人二
年四月杭州又火六年八月己巳延平路火燔官舍民
居八百餘區死者五人十年興國路自春及夏城中火
災不絕日數十起二十年惠州路城中火災屢見二十
三年正月乙卯夜廣西貴州火同知州事韓帖木不花
判官高萬章及家人九口俱死焉居民死者三百餘人
牛五十頭馬九匹公署倉庫案牘焚燒皆盡二十八年

二月癸卯京師武器庫災己巳陝西有飛火自華山下
流入張良弼營中焚兵庫器仗六月甲寅大都大聖壽
萬安寺災是日未時雷雨中有火自空而下其殿脊東
鼇魚口火焰出佛身上亦火起帝聞之泣下亟命百官
救護唯東西二影堂神主及寶玩器物得免餘皆焚燬
至元二年八月丙寅濟南鄒平縣進芝一本八年八月
癸酉益都濟州進芝二本是年武安文廟大成殿產芝
九莖金色叩之有金玉聲十五年四月濟南厯城縣進
芝十九年六月芝生眉州青神縣景德寺二十二年十
月長葛鄆城各產芝草二十三年四月丁未江東宣慰

司進芝一本十月濟甯進芝二本二十六年三月癸未
東流縣獻芝四月池州貴池縣民王逸進紫芝十二本
六月汲縣民朱良進紫芝二十八年三月芝生鈞州陽
翟縣二十九年六月芝生賀州大德五年十二月興元
西鄉縣進芝一本色如珊瑚六年正月濟南鄒平縣進
芝一本五枝五葉色皆赤至大四年八月芝生國學大
成殿延祐二年三月芝生大成殿五年七月芝生大成
殿後至元元年十二月芝草生於荆門州當陽縣覆船
山一本五榦高尺有二寸一本二榦高五寸有半榦皆
兩歧二本相依附扶疏瑰奇如珊瑚枝其高者結爲華

蓋慶雲之狀五年十二月芝草生於中書工部之屋梁
一本七榦至正六年夏西湖書院生瑞草

至元十一年十月衢州東北雨米如黍十一月建甯浦
城縣雨黑子如稗實邵武大雨震電雨黑黍如蘆稭信
州雨黑黍鄱陽縣雨菽豆郡邑多有民皆取而食之十
六年六月彰德路葦葉順次倚疊而生自編成若旗幟
上尖葉聚粘如槍民謠云葦生成旗民皆流離葦生成
槍殺伐遭殃又有黍自生成文紅稽黑字其上節云天
下太平其下節云天下刀兵十八年處州山谷中小竹
結實如小麥饑民采食之二十一年明州象山縣竹穗

生實如小米可食

至正十一年廣西慶遠府有異鳥飛見於述昆鄉飛鳥
千百隨之蓋鳳凰云其一飛去其一留止者爲獐人射
死首長尺許毛羽五色有藏之以獻於帥府者久而其
色鮮明如生云五月興國有大鳥百餘飛至郡西白朗
山顛狀如人立去而復至者數次十九年京師鳴鵲夜
鳴達旦連月乃止有杜鵑啼於城中居庸關亦如之二
十三年野鴿巢興聖宮數年蕃息數千驅之不去二十
七年三月丁丑朔萊州招遠縣大社里黑風大起有大
鳥自南飛至其色蒼白展翅如席狀類鶴俄頃飛去遺

下粟黍稻麥黃黑豆蕎麥於張家屋上約數升許是歲
大稔至元十五年四月濟南無棣縣獻白雉

中統二年正月辛未御帳殿受朝賀是夜東北有赤氣
照人大如席元統二年正月庚寅朔河南省雨血眾官
晨集忽聞燔柴烟氣旣而黑霧四塞咫尺不辨腥穢逼
人逾時方息及行禮畢日過午驟雨隨至霑灑堊墻及
裳衣皆赤至元四年四月辛未京師雨紅沙晝晦至正
五年四月鎮江丹陽縣雨紅霧草木葉及行人裳衣皆
濡成紅色十三年三月丙戌彰德路西南有火自天而
下如在城外覓之無有十二月庚戌京城有火見於東

南潞州襄垣縣有火墜於東南十四年衛輝路有天光
見於西方十二月辛卯絳州有紅氣起自北方蔽天幾
半移時方散十五年春薊州雨血十八年三月辛丑夜
大同路有黑氣蔽於西方聲如雷然俄頃有雲如火交
射中天遍地俱見火光以物觸地輒以火起至夜半空
中如有兵戈相擊之聲二十一年七月己巳冀甯路忻
州西北有赤氣蔽空如血逾時方散八月壬午棣州夜
半有赤風亙天起西北至於東北癸未彰德西北夜有
紅氣亙天至明方息乙酉大同路北方夜有赤氣蔽天
直過天庭自東而西移時方散如是者三十月癸巳昧

爽絳州有紅氣見於北方如火二十三年三月壬戌大
同路夜有赤氣亙天中侵北斗六月丁巳絳州日暮有
紅光見於北方如火中有黑氣相雜又有白虹二直衝
北斗逾時方散庚申晉甯路北方日暮天赤中有白氣
如虹者三一貫北斗一貫北極一貫天橫至夜分方滅
八月丙辰忻州東北夜有赤氣亙天中有白色如蛇形
徐徐而行逾時方散十月丙申朔大名路向青齊一方
有赤氣照耀千里二十四年九月癸酉冀甯平晉縣西
北方至夜天紅半壁有頃從東而散二十八年六月壬
寅彰德路天甯寺塔忽變紅色自頂至踵表裏透徹如

煅鐵初出於爐頂上有光焰迸發自二更至五更乃止
癸卯甲辰亦如之先是河北有童謠云塔兒黑北人作
主南人客塔兒紅朱衣人作主人公七月癸酉京師赤
氣滿天如火照人自寅至辰氣焰方息

洪範曰木曰曲直失曲直之性時則有木冰木妖狂人
鼠孽時則有雞禍其徵恆雨其色青是爲青眚青祥

至元三十年正月雨木冰三日大德七年十一月辛酉
木冰至順二年十一月丁巳雨木冰十二月癸亥雨木
冰後至元五年十一月癸酉瑞州路新昌州雨木冰至
明年二月壬寅冰始解至正四年正月汴梁路鄭州尉

氏洧川河陰三縣及龍興靖安縣雨木冰十一月東平
雨木冰十二年九月壬午冀甯保德州雨木冰十四年
冬龍興雨木冰二十五年二月辛亥汴梁雨木冰狀如
樓閣人物冠帶鳥獸花卉百態具備羽幢珠葆彌望不
絕凡五日始解

至元十九年處州麗水縣樟樹生梨可食元貞元年太
平路蕪湖縣進榆木有文曰天下太平年後至元三年
夏上都大都桑果葉皆有黃色龍文九年秋奉元桃杏
實十一年夏松江普照寺敝帚開花嘉興儒學闡人陶
氏磨上木肘發青條開白花又吳江分湖里柳樹枯椿

生長條如葦進賢縣瑞竹生十二年五月汴梁祥符縣
椿樹結實如木瓜十六年七月彰德李樹結實如小黃
瓜民謠云李生黃瓜民皆無家二十一年明州松樹結
實其大有盈尺者八月汴梁祥符縣邑中樹木一夕皆
有濕泥塗之

憲宗七年九月霖雨連月九年夏四月大雷雨凡二十
日至元七年八月保定路霖雨害稼九年六月丁亥京
師大雨十年霖雨害稼十二月河間霖雨二十三年九
月乙丑朔雨壞太廟二十四年六月霸州益津縣霖雨
傷稼九月太原河間河南等路霖雨害稼二十五年五

月汴梁大霖雨六月睢陽霖雨七月保定路霸遼二州
淫雨害稼八月嘉祥魚臺金鄉三縣淫雨九月莫獻二
州淫雨保定路淫雨二十六年六月濟甯東平汴梁濟
南順德真定路濱棣州霖雨害稼七月辛巳雨壞都城
八月大都路霖雨九月昌國亦如之二十七年二月晉
陵無錫二縣霖雨四月芍陂屯田霖雨七月終南屯田
霖雨江西淫雨二十八年八月大名清河南樂諸縣霖
雨爲災九月河間淫雨元貞二年八月甯海州霖雨大
德二年七月大雨五年八月平灤路霖雨是年峽州隨
州安陵荆門泰州光州揚州滁州高郵安豐霖雨六年

五月歸德徐州邳州睢甯縣雨五十日十月濟南濱棣
泰安高唐州霖雨害稼七年浙西淫雨八年五月大名
滑濬德州齊河霖雨六月丁酉汴梁祥符開封陳州霖
雨九年六月潼川霖雨十年六月景州霖雨十一年九
月襄陽霖雨至大二年德州霖雨害稼四年七月河間
順德大名彰德廣平等路德濮恩通等州及冀甯祁縣
霖雨害稼皇慶元年龍興路新建縣雨害稼延祐元年
五月武陵縣霖雨二年七月潭州金州永州茶陵霖雨
四年四月遼陽蓋州雨水害稼六年七月霸州文成縣
雨害稼七年五月汝甯府霖雨至治元年江州贛州淫

雨二年閏五月安豐路雨傷稼三年五月大名魏縣淫
雨保定定興縣濟南無棣厭次縣濟甯碭山縣河間齊
東縣霖雨害稼泰定元年七月真定廣平廬州十一路
雨傷稼德州曹州淫雨八月汴梁考城儀封濟南沾化
利津等縣霖雨損禾稼二年五月浙西諸路霖雨六月
奉元衛輝路及永平屯田雨傷稼九月漢中道文州霖
雨三年十一月廣甯路霖雨傷稼四年十月大都路霖
雨是年開封霖雨至順二年九月湖州安吉縣霖雨三
年六月京師霖雨元統二年三月山東霖雨至元元年
六月大霖雨二年五月乙卯南陽鄧州大霖雨自是日